

摘藻堂四庫全書薈要

集部

欽定四庫全書薈要卷二萬三百七十

集部

元詩選初集卷十

長洲 顧嗣立 編

方夔富山嬾稿

夔一名一夔字時佐淳安人生於宋季嘗從何
潛齋遊究心義理之學攻舉子業不利於有司
退隱富山之麓扁其堂曰綠猗授徒講學其間
自號知非子學者稱富山先生所著有富山嬾
稿曾孫宗大編次五世孫文傑刻之明正統間

同邑周瑄為之序謂其文詞聲容雅淡不為體裁音節之所拘商素菴曰富山詩紆餘渾厚弗事雕刻亦足以觀先生冲雅之操矣今其集中所載閔忠詩云自鄭有謀歸華氏舍湘無地託王琳謂文文山也誅茲云爾身不卹無埋地此恥奚容更戴天謂賈似道也其忠義之感凜然言外他如春盤脆響供雷筍夜焙芳鮮摘露芽蠶老任眠催作繭燕來新乳賀成家畫角吹殘

低戍火莫鴉衡斷遠邨煙滴愁細雨驚秋莫照睡
青鐙伴夜闌月鵲自驚翻舞影露蛩相弔洗唳痕
亦多雅秀之句也

古意四首

龍文雙寶劒誰鑄吳山英秋水光的皜俯視千金輕猶
餘報仇血白帝金天精百用不缺折潛鋒埋故城芒角
不可掩氣衝牛斗星卓哉兩達士一旦出幽冥顯晦各
有數飛沈兩無情孤雄顧其雌玉匣時悲鳴吳楚隔千

里滄波會神靈一體互分合變化不暫停悠悠劍津水
早莫風雲生

陽聲鼓羣動更變無停機至人奪造化假合出範圍渭
川起老龍一龍不得隨化為百尺竹玉立青差差仙人
去市門三年願相依金丹遲不就失路將安歸臨分授
之杖平地去如飛還家尚肉眼棄擲不復持回首失蹤
跡飛騰息天池惟餘萬叢玉年年長新枝猶疑風雨夜
回龍嘯空陂

秦皇滅諸儒若人媚幽獨偶來得名山依山結茅屋希
聲陶淳風無意蘄絕俗兒孫日以遠幾見碧桃熟漁郎
從何來延緣寒溪綠茲遊窺天秘平生未經目頗見有
此容父老邀我宿清談略晉魏世路嗟翻覆淹留信可
樂離念苦羈束翻然理回櫂瑟瑟風吹足往來記行迹
溪路三四曲機心不自悶何事驚麋鹿回首不逢人白
雲渺空谷

遼海有黃鶴脩然出塵姿結巢青松頂百丈無柯枝巖

石護其卵清露哺其兒一朝羽翼成丹霄恣遨嬉夕倦
宿月窟朝饑飲瑤池升高忽反顧昔是今已非歸來三
歎息塵俗無由知焉能與衆鳥啐啄隨雄雌欲語不可
了復作摩天飛仰望邈不及千載留餘悲

錢王守鳬墩在臨安道左

山下鐙龕挂紙錢水楊墩上草芊緜高人不要金丸用
買得三吳八十年

雜興

世奕奔趨若決河誰將獨立障頽波指衣太守存唐苦
循髮將軍負漢多薜芷不芳甘自變白圭有玷尚堪磨
是非勿與時人說為就重華述九歌

盧明之開鑪

嬾作西風汗漫遊歸謀諸婦此淹留采花墩近初成酒
種秫田多早帶秋燕領已空西塞夢犢羸莫遣遠山愁
滄江留得偏醒客袖手時凭百尺樓

無愁潭

酌彼無愁酒歌我無愁詩竭來無愁潭上弄明月漱滌
萬慮清肝脾平生蓄積總開豁便欲遺世超希夷持杯
試問此潭水昔來何處今何之覆船山高寒發葉玉泉
飛下東天池分流一瀉數百里直抵絕壑潄清漪鏡平
百丈洞無底其下深黑蟠蛟螭幽蘭薜芷亂洲渚倒影
寒浸枯松枝千回萬折流到海波濤噴薄孤城危潮生
水滿潮退涸蓬萊清淺條改移此愁與水兩無盡昔人
已去今人悲君不見莫愁鄉下春水長畫船鼉鼓相追

隨淡煙芳草望不斷石城荒廢留空陂不如此潭只在
山水窟縱有奇勝無人知何曾紅粉照清泚但有欸乃
漁翁詞一聲歌斷莫山碧秋風兩鬢寒颼颼

木犀花

曾住仙山九折巖夜涼蘿荔挂衣衫月窺尊裏如相伴
人立花邊自不凡叢綠聯環瑤玉佩殘黃瑣骨現金函
枝空蟾窟今誰記猶道東陵繫舊銜

耜巖連和六首予與汪子新亦各再和

夜隨涼氣坐秋巖醉墨淋漓亂點衫花裏固知仙種別
詩中肯道使君凡乘風徑欲眠香窟修月曾經發寶函
收拾萬金歸賈橐不須麟閣大書銜

舟泊松江

尊江幾度酹張翰屈指今纔二十年昔日米囊羞破釜
莫年詩卷壓歸船飛飛燕子依風席漠漠楊花點客羶
草遠煙濃迷處所鄉心飛去白雲邊

清明

漢世諸陵已古丘悲風撼撼老梧楸金人往日淚曾墮
石馬何時汗忽流江北江南千里隔身前身後百年愁
九原定有英靈在消得寒儒浪白頭

雜興四首

老去蹉跎萬事休襟期甚不入時流倦飛已作歸林鳥
嬾起猶如落草牛一點眉黃無宦況五分頭白總詩愁
玉人期我滄洲上未擬他年賦遠遊

已更門戶自持鉏謝絕交遊與世疎處變卿還用卿法

養高吾自愛吾廬屏張前世無聲畫架揷今生未見書
水北山人偏解意求分半席間樵漁

冷落門牆絕似冰夜窓風雨耿孤鐙采盆任我翻成雉
浣墨從渠點作蠅休說文章祇小技由來富貴總無能
依稀楊李無人憶但憶瀛西杜少陵

先生高寄此林泉嬾拙方知此樂全足屨兩忘便不借
人琴俱隱付無絃雲歸書帙留殘潤日上香盤裊細煙
勘破世紛無一事又拈枯筆續前編

邑郭旅中

出獵將軍夜打圍
劒頭炊火割鮮肥
山林儘有逃生處
自是驚麕觸禍機

春日言懷

睡覺東窓味正濃
鶯聲破曉入簾櫳
社前處處石泉水
春半時時花信風
交友如雲翻手散
浮生是夢轉頭空
癡兒不識愁滋味
笑詫花枝滿把紅

立冬前後大雷電震者數日

雲如車礮低壓城紅光閃電枉矢行老龍偷出牛蹠泓
霹靂數聲驚宵冥雨下如注翻四溟黑風吹落魚鮪腥
蚯蚓奮角蛇怒鱗穴居林處無潛形小臣飛牋奏天庭
速收阿香加誅刑夜闌景霽百怪停炯炯北極環衆星

巖峰寄洪復翁

巖峰孤尖來何雄此地金紫山為宗西行百里無去處
突起峭壁高衡嵩一支側走截水口鱗甲閃閃卧玉龍
龍來苦渴噴澗水光芒錯出千丈虹試緣石磴步巉絕

圭笏琬琰來會同

山形如圭笏

天風回聲過絕頂波濤洶洶

生寒松銀灣玉澗斲冰雪飛雪六月聲崢嶸孤撐碧落

望北極世間無此奇絕峰其下仙人昔蛻骨玉棺往往

留遺蹤

山下有復翁祖塋

昂頭欲語忽飛去時有歸鶴來遼東

住持山人子洪子枝葉遠出厓仙翁妙年歷落出塵想

幽幽桂樹生芳叢溪山佳勝屬彈壓綺語異境爭天工

心期不與俗子偶移文招我來山中劇談抵掌振林谷

妙趣脗合比鐘鏞丈夫舒卷自常事要令丘壑藏心胸

他年蓄久極必泄膚寸油雲雨太空

桐關大石

蓋天蒼蒼非虛空高懸萬象驚愚蒙仙人朝罷玉帝側
戲拋黃土留遺蹤何年墮此作砥柱千古屹立洪濤中
巨魚出沒深不測罅縫草長蒲花茸淙淙細浪夜春擊
水石韞韞鏗金鐘我來載酒坐其上扁舟南下編青蓬
飲酣恍恍欲飛去如踞猛虎騎遊龍夜深酒醒山月落
一曲短笛橫秋風

春晚雜興二首

未妨行樂少年場，倚徙東風醉一觴。
芳樹染成唬血艷，落花流出漲痕香。
陰陰春色和天老，脈脈愁情共水長。
坐閱流年能幾見，菱花應笑鬢邊霜。

花神

關

去青宮紫陣紅圍，一夜空華髮龍鍾。
寒食酒青蕪狼籍，落花風雨聲點滴。
春愁裏，世態侵尋客路中。
我欲憑高寄蕭散，暫舒老眼數歸鴻。

田家雜興二首

樵路通邨暗蒺藜數椽茅
莖護疎籬陰陰清樾風生樹
拍拍蒼鵝水滿陂記日旋鉏
燒地粟上時新賣落車絲
晚晴慚愧逢端午醉卧黃昏
自不知

兩兩蒼髯笑杖藜
舊裙兒女隔芭籬斜陽鴉噪
燒錢社細雨牛眠放牧陂
酒熟十千沽玉漉麩香三丈
卷銀絲客來偶及興亡事
說與衰翁也自知

四時詞四首

陽和不解徧深宮黯黯春愁
竚立中歲給買花藏篋筭

夕香拜月散簾櫳
鏤金巧勝勻如翦
綳縠中單薄似空
一曲紫簫吹徹後
薔薇幾度老春風

披香簾卷幾斜暉
別殿承恩似覺稀
風蕩影搖陰欲轉
露蟬聲徹暑猶微
肉痕淺印丹砂血
手跡新裁白紵衣
例賜扇紈長棄却
雙雙羞看綵鸞飛

七夕閒登乞巧樓
屬車隱隱認宸遊
幾行宮樹女牆月
一闌庭花御苑秋
戲展紅牋圖蛺蝶
強拈綵綫候牽牛
轆轤聲斷屏山冷
一夜寒蛩替說愁

手撚梅花暗斷魂十年柘館未承恩
曾催奏曲臨妝閣暫出行香到寢園
月照金鋪關永夜雪浮銀礫耿黃昏
并州翦就釵梁燕又逐年華作上元

初夏雜興二首

肥梅貼暈麥搖芒四月山居取次涼
古砌月鋪銅沓冒寒松風撼鐵琅璫
兒孫猶有將軍臭廝役空知太尉香
有客縱談當世事薜蘿深處更移牀

天氣如秋意轉闌高樓簾枕帶餘寒
棟花零落魚初發

梅子青黃雨不乾客怕遠行催早宿農逢小熟勸加餐
近來悍吏經過少更喜深山好長官

九里路

去年九里路烏攫人腸挂枯樹今年九里溪沙頭白骨
高復低人生變滅如泥土久後猶傳姜萬戶翠眉紅頰
誰家兒夜赴軍前效首虜將軍多愛恩意疎分將吳口
充苞苴殷勤道與送行使前日朝官多有書

唐人攻藩
鎮中朝官

多以書託主將
求沒官妻妾

七夕織女歌

牛郎只尺隔天河鵲橋散後離恨多
今夕不知復何夕遙看新月橫金波
拋梭擲絰愁零亂彩鳳飄飄度霄漢
重來指點昔遊處香奩寶篋蟲絲滿
一年一度承君顏相別相逢比夢間
舊愁未了新愁起已見紅日銜青山
當初謾道仙家別日遠日長不相接
不似人間夫與妻百歲光陰長會合

秋夜

露白初濡木星虛漸集房蛾飛爭墮水魚退急投梁檣
練隄防冷收禾準備荒只愁棗紅地萬馬逐殘羌

早行

早起理歸裝殘鐙耿曙光開門半山月立馬一庭霜鐘
響知雲寺波聲認石梁脩途留不住去去出山莊

寄何稼隱

欲出孤雲意已闌東風吹夢落東安鐙前鄉國千山隔
窗外乾坤一面寬放馬脫韁嘶曉岸連檣牽索上晴灘

闌干倚遍空相憶
花落芳洲春半殘

沃祥卿和前韻見寄再和答之

西轉東移客興闌
風枝驚鵲不曾安
孤吟愧我詩筒澀
百罰憐君酒令寬
西閣梅林迷雨浦
畫橋松韻接寒灘
相思一夜知何處
夢醒樓頭鐘欲殘

過棠山徐墳欲招通甫不果晚憇景德觀以歸
寄通甫

送春過棠峰假步自登眺行田走詰屈攀磴上竚窅岡

巖聳四圍崖壁儼雙峭野芳躑躅紅林宿離黃叫感彼
松下人脆甚風中燎精靈散埃氛骨肉閉竅竅晝眠
狉狉夜照飛熠燿朗悟豁餘悲清響發長嘯思君客沃
洲對面隔蓬嶠扣門乏因緣更僕煩請召流落俱異鄉
節奏本同調風高鷁退飛月落牛反噍夷猶憇仙宮酬
答領道要幽尋屋種梅雜坐逕披藿棋枰收半局丹竈
晝殘燒心期迥獨詣世誘浩難掉詩興逼行雲樹色留
晚照拾翠記前遊舉白倒餘醕桐尾隱寶匣龍文掩魚

鞘何日聯華鑣葭茨亂漁釣

溪上

古木陰陰溪上邨
隔溪呼喚隔溪鷹
柳堤漁艇水雙港
山崦人家雲半層
早麥熟隨芹菜餉
晚茶香和樹芽蒸
自慚未得亢桑樂
癡坐寒窓似凍蠅

田家

晌午鴉鴉響踏車
那邊叢薄有人家
老農歇熟藤陰下
一樹冬青落細花

田家四事

耕

古人以農仕仕即為公卿未仕有常業安得不躬耕我
耕常及時破塊當初晴墳墟土性異勤怠人力并泥塗
淤手足霧露沾裳纓婦子挈午餉勞苦寬我情罷耕亟
放牧吾牛亦飢鳴投耒重回首深山空月明

種

我生古揚州田下異梁雍山田種荒萊水田種浮葑地

力肥瘦兼農器有無共及時撒新穀搏黍遞幽哢生意
日夜長移秧趁芒種未嫌豚酒祝自樂雞黍供落日竹
枝歌猶是幽原頌

耘

良苗已入土田間水沄沄昨夜苗根發翳葉如煙雲草
生害我苗匝月一再耘是時人苦熱出門天未昕鬱蒸
體流膏爬捥手生皸手茶擁根節腰草驅蠅蚊青青矜
佩子從事哀我勤我勤自樂此爾非沮溺羣

穫

涼風入衣襟斜日照墟落我稼將登場築杵聲橐橐宵
征備冠盜日行呀鼠雀腰鐮赴田間是處竟秋穫刈疾
笑翁健負重慚兒弱山炊雜戎菽野草配場藿人生累
衣食計較一餉樂已矣復何言吾生老耕鑿

木犀二首

下土花中第一流移根自笑此生浮獨依上界清虛府
滿貯青冥沆瀣秋稜葉風翻低散亂蒼皮蟲蝕老雕鏤

醉來逕向高寒處自駕青鸞擁玉蚪

蒼蒼珠樹俯寒流析木津頭戲拍浮
褐鳳搏風朝紫極硯蟾滴露瀉清秋
返魂香倩羅裳貯礙月枝憑玉斧鏤
夜景未闌清入骨瀟瀟鱗甲卧癡蚪

感興 錄八

斑斑林中雉雌雄伺朝暉鼓翅飛不遠
山田麥苗肥飲啄百步間未莫相隨歸
當春哺羣雛長大各自飛宇宙豈不大
嗟爾為生微窮途守一轍畢命芝與薇

婉婉馬上女兩頰瑩寒玉弓彎鼓鐙蹋側立紛相逐借
問誰家兒近出常山族兒家昔鼎貴煌煌什朱轂父親
守常山忽值戎兵蹙起義功不成巢傾卵亦覆妾身轉
流落歲久無錢贖欲去無緣由安得南飛鵠

朱樓遠迢遞繚以十里牆浮雲隱華桷夾路翳杉篁山
河未曾改世事不可量往者胡馬來玉人意蒼黃半死
半脫走兒女不及將朝為綺羅叢莫作瓦礫場近傳有
胡妾託身于襄陽一男作酒保相望居河梁骨肉各分

別中原渺茫茫浮榮何足羨俛仰悲荒涼

朝登北邙坂莫抵樂遊原
燐火翳復吐髑髏夜呼冤
不見昔時主但見陵與園
銀鳧已羽化石馬猶草根
向來爭天子一口吞乾坤
誰知百年後不免遭樊溫
寶玉頻發掘朽骨無精魂
景昭去何處芳草悲顏垣
縣官供衣食當時多子孫

月府有奇木根幹飽清露
生香異凡間衝風落天路
高枝舞青鸞低枝弄霜兔
姮娥方妙年衣采純純素
娉婷

不肯嫁含情待誰訴昨與汗漫期徑向銀河渡授我不
死藥倚徙怨遲莫即席欲服食終夕愁相誤悠悠下高
寒回首空煙霧

天陽居盛夏生長無時休熒惑欲何詣渴奔極炎洲老
龍恐枯死深潛閔陰幽攢峰擁凝碧玉鑑開寒眸神靈
護毗俗盤盂置鰕鰕雷公持玉斧天女挾行轡行雨豈
不苦驪嬾化癡牛煌煌飛電光上下窮其搜嗟龍獨何
避自愧乏世求變化付雛衆畢命歸寒湫

冀北渥洼種墮地已汗血深目老奚奴日夜供翦刷一朝混南朔馳道三丈濶道邊館候騎歷歷抵燕越吳兒富金錢補買計家活牽來中程度火印死不減置之皁櫪中時彼芻與秣往來給官行飛去如電抹奔走皮骨空不見淹歲月區區鹽車中莫笑駑馬劣

萬山斗入處百獸家其間天寒橡栗富朝食莫未還不
知鵲與盧與之有何冤霜晨飽以飯獵夫亦加餐昨日
料蹠跡銀灣水猶渾解紕任所之
閑氣升岡巒忽然得

遺臭逐逐窮千山歸塗巖谷震倒挂九節斑
渾舍喜欲舞明朝急輸官犬乎爾誠能終然死
霜管

夜坐苦蚊

萬物有常理動息隨昏昕區區蟲豸中惡毒無如蚊云
是鬼母化佛語非傳聞喙尺利芒刺腰圍隱花紋飢尋
飛翅輕飽飲酖顏醺搏噬以自肥乘時鼓妖氛潛伏草
莽間窺伺日向曛須臾却四出攢集窮崖垠橫空聚復
散如布鵝鵲軍騰身飛猱捷發喊迅雷礮瞥然闖門戶

來者何繽紛不但入翠幕偏工惱紅裙端坐缺隄障各
各磨牙齧血肉生咀嚼斑駁豚與鰕如塗辟宮血丹砂
服兼斤紈扇不佳手搖動酸骨筋或時中指麾殷輪血
朱纁雖能殺一二未足空其羣有來效方略薙草收蕝
薰延燒煽煙焰殺氣凝陰雲羅空燭鴉隼搜野醯麋麋
醜類盡驅逐暫息苗與獮自從生盤古元氣日磔分有
生潰亂出甘苦更臭芬而我墮世味未能去羶葷天陽
燦六合曼膚似遭焚之蟲并搜攪入夜無一傾誰知有

制伏火攻策奇勲當如運甓法百匝不憚勤事會靡終
極來者徵吾文

食西瓜

恨無纖手削駝峰醉嚼寒瓜一百筩縷縷花衫粘唾碧
痕痕丹血搯膚紅香浮笑語牙生水涼入衣襟骨有風
從此安心師老圃青門何處問窮通

送吳友直過吳門省親

海濶天南不盡頭雁來豈為稻粱謀飄零骨肉憐杯酒

老病形骸戀破裘

時有足疾

日暮片雲勞望眼天寒孤櫂發

行舟十年冷落江鄉夢願借西風過橘洲

續感興 錄八

猛虎等百獸天賦與長雄曼胡利秋戟隅目磨青銅從
知世路暗羣行各西東吼地一長嘯颯颯來悲風飢來
待人肉不數豹與熊肥領而黑喙不知是何蟲坐卧不
自防穴爾皮毛中爾虎雖云猛一旦皮骨空慎勿欺微
細即且制神龍

惡木生高岡枝疎上指天雨露非有私蟠踞幾何年
子寢其下山鳥棲其巔匠石過不睨生理得自全皮為
野火燒根為螻蟻穿空中不足恃一朝踣而顛上有千
歲藤相依久纏綿樹猶不足保爾藤何足憐

二女灑竹淚盡是心中血精誠著於物千載猶不滅當
時從南巡豈少稷與契奈何比孤纍匍匐陽城謁皇英
獨何人風泉共幽咽可憐女子心慷慨男兒烈湘水流
不斷誰道恩情絕何時見歸來續君遠離別

老火久斂戍蓐收令西方塵沙隨白日慘澹無晶光故
葉改顏色過雁新著行孤坐墜秋月寒鐙颭空房悵然
盛時節開絨理衣裳芙蓉久當采浩蕩不可量芬芳易
消歇歲莫安得長母為守闕死萬代同山岡

黃鵠浴海水一舉陵紫埃長風九萬里正值天門開不
知食何食雲路方徘徊嗟我鴻雁侶避寒聲悲哀失身
墮泥滓腹背日摧頽城東極惡少挾彈巧相猜稻粱未
足溉雲雨何時來不希俯修翮有分終蒿萊

揚州舊服卉木棉白茸茸縷縷自余年紡績鐙火中織
成一束素上有浴海鴻歲寒若可恃淒淒凜霜風昨夜
縣帖下頭網出城東殷勤赴官急癥瘡免殷紅我寒那
可忍負此卒歲功不知落誰手輸入秦娥宮

匣空龍得偶厨封晝通神可憐種瓜客猶自標故秦當
時祖龍死逐鹿灞水春早飛將軍檄晚分丞相茵抵死
心不閒不顧芻狗陳陶朱去越後未肯休此身猶聞載
窈窕千金散賤貧何如白雲叟自與青山鄰十年一易

世眉目輒少嘖悠悠華山裏甘作騎驢人

驚禽營顆粒飛飛集丘隅遊子困行役十年落江湖煌煌秦與洛運轉天下樞啓明曜東漢萬足爭奔趨豈無爪距力逐利如孫吳得失昧前料青雲間泥塗天命有厚薄定分不可踰歸來北山下俛仰收桑榆

過深浦羅給事隱舊居

給事三父子著籍古池陽販夫偶竒貴未莫來錢塘維時漢運衰紫宸厭天狼長鯨沸河洛幅裂萬里疆惟子

曉大義白筆搖風霜願提十萬旅巢穴傾朱梁青雲不
假翼無路凌高翔其事竟無成青史垂芬芳中原轉莽
莽一垤爭侯王登高挾浮雲極目慘八荒遐想同心人
過君橋梓鄉徘徊扣牧子遺跡悲荒涼區區夏蟲知知
我於詩長豈知用心處流落不忘唐我欲傳高士置君
後柴桑含情苦搖蕩佇立滄洲旁

遊渌渚

朝遊伍胥渡莫投杜主祠綠蕪高犢背紅雨瘦花枝夾

道鳴腰鼓輕舟颭綵旗
蹇驢寒服客未許看腰肢

曉行

百年長擾擾無地寄浮蹤
客醉傷春酒人行送曙鐘
煙霏嘯謝豹星斗壓盧龍
笑共孤雲去歸投江上峰

苦熱

六月紅雲不肯移
清心自合勝炎曦
雲根斲藥移松骨
石罅分泉插木皮
未用冰蠶來海嶠
坐看凍蟻走蛾眉
人間寒暑相催促
迫待寄東溪萬縷絲

雜興

衰草含煙木葉黃空城搖落客思鄉
雁高孤月臨空塞
魚退殘星過曲梁
醉眼昏花迷野馬
帖書戲草掣風檣
閒來更試絲綸手
新釣江鱸一尺長

晚眺

依稀風景小
羌村不欠東屯稻
菽園阿魏擣香風
送響
雕胡擘玉水
開痕招邀紫翠山
當座標撥紅黃菊
上盆
世上去來俱是客
隨風吹送夢歸魂

秋晚雜興六首

烏桕數家邨漁樵自作鄰舊墳前日發富室近來貧古
道狐成怪深山鬼作人茫茫塵世事無處問蒼旻

天涯誰道遠嶺海接并幽馬帶交河種人穿真臘裘梅
花南國夢苜蓿故宮秋安得方仙道飄飄訪十洲

地占鯨雄郡人奔財賦疆北僧泥佛相南客賈胡裝打
穀拳毛馬彈箏踟躕娼西風愁世路無路立蒼茫

青溪溪上路書劒此棲遲涼月穿衣褐寒波照鬢絲古

桐傳賀若橫玉犯龜茲不為傷秋老孤吟自可悲

蟲壁話秋闌西齋日已寒階鳴辭故葉水擊跼飛翰路
接千峰榭潮通百丈灘葛仙無處覓我欲看燒丹

蕭索已秋色空濛欲莫天平蕪荒樹外疎柳斷橋邊山
暝殘雲合波停碎月圓凍前森萬境忽忽暗彫年

和府尹虛谷先生和徐子英韻并寄徐子英

袖手闌干獨倚樓暫舒倦眼對滄洲雲山勸我閒方住
聲利縈人嬾即休後世豈無青史筆浮生那欠赤泉俟

巖幽得似銅駝陌粟飯藜羹却易求

夜坐

風葉夜蕭騷寒鐙照寂寥冷泉和月汲殘葉帶霜燒半
白吟髭茁餘紅醉臉潮舊來樵牧地小隱不須招

元詩選初集卷十

總校官候補中書臣吳紹濬

校對官編修臣范 衷

校對官編修臣馬啟泰

謄錄貢生臣張誠智

謄錄監生臣夏清和

欽定四庫全書薈要

集部

元詩選初集卷十一



詳校官候選知縣臣吳甸華

欽定四庫全書薈要卷二萬三百七十一

集部

元詩選初集卷十一

長洲

顧嗣立 編

熊銖勿軒集

銖字位辛初名禾字去非勿軒其號也又號退齋
世居建陽之鼇峰志求濂洛之學訪朱子之門人

輔氏而從遊焉宋度宗咸淳十年登進士第授寧
武州司戶參軍宋亡遂隱不仕創雲谷書院四方
來學者翕然歸之元仁宗皇慶元年卒年六十所



著有四書標題易經講義詩選正宗小學句解等
書傳於世裔孫澍家藏遺稿僅存十一族孫孟秉
類次成帙釐為八卷明成化初六世孫斌刻之先
生之論詩曰靈均之騷靖節子美之詩痛憤憂切
皆自其肺肝流出故可傳也不然雖嘔心冥思極
其雕鏤泯泯何益先生言此蓋已得詩之本原矣

泊舟野望

樹色連雲色春歸物更妍落紅飄近岸新綠漲平川野

鶴窺漁筍沙鷗避客船斜陽江上立搔首意茫然

聞崇安縣學立碑

出山未逾月輒復入山去平生武夷志茲遊適真遇
茅簷可遂豈但山水趣扶搖欣夙心躊躇動長慮恭惟
文公學倡道匪虛語向微剖析功斯人遂聳瞽齋居一
原歎此歎無人寤晚年制作心門人未輕許真實浸次
寥枝葉謾誇詡漂淪未百年竊據立門戶吾黨固有愆
斯道自今古扶偏須忠臣邪說可無距同志此來遊興

言激余素禮樂愧河汾興唐竟誰予大隱堂前水滔滔
自東注回薄萬古心無言對天柱

上致用院李同知論海舶

易經致民用肇自義農先耒耜既生聚市易還懋遷公
私不交病本末無倒懸古人致主術稱物靡有偏厥初
禹作貢不但中邦田四海自錫貢不憚來遠邊碣石來
冀右海岱青徐連東南竝淮揚亦自江海沿夫豈寶遠
物有道歸陶甄成周制國用半在周官編虞衡與商賈

胡不末利捐艱難開國心什一猶欲蠲哀益固有道公
功格皇天後儒不知學說理多虛玄生財昧大道民命
日益脰管商一作俑蠹弊貽千年漁鹽尚抑末奈何誘
開阡懷清一以築甓獨堪哀憐封君擅半賦公私重熬
煎寒機凍女手汗粒頽農肩織衣不上體春粟不下咽
傷哉力田家欲說涕淚連何如棄之去逐末利百千矧
此賈舶人入海如登仙遠窮象齒徼深入驪珠淵大貝
與南琛一作金錯落萬斛船取之人不傷用之我何愆奈

何昧輕重屑屑窮筭鞭錙較鷺股漏網魚吞船安得
體國臣為天掘璣璇上資國脈壽下拯民瘼瘡朝夕禹
貢志非食甘胝胼九載不入門千古孰與賢更想公旦
心待旦尤乾乾世俗各與驕曾不絲毫牽所以泰和治
常在虞周前此道久已亡利欲充培塿豈曰治不及曾
是心無傳明公中州傑自是天分全問學甚充厚願力
還精堅博物功不勞無欲心湛然維此一樞軸實秉大
化旋如天有北斗物物歸璣璿帝念南海民風化舊所

宣皇皇風霜節炳炳奎壁躔纖微亦何免闔散有大權
利用六府修制用九府圜古人不可作得意皆蹠筌誰
哉識治本理此大化絃三代事寂寞念之中心悵書生
武夷客偶此來海堧使者採風謠詩歌寓惓惓

遊武夷山

我來武夷山遠意超千古嘗疑混沌開疏鑿未經禹峽
山猶古梁洪濤莽回互行舟留大壑營巢餘斷樹垠崖
波濤痕隱隱皆可覩陶然上古民要服固深阻秦威何

桓桓薄海猶廣土六合皆湧沸一枝豈寧處嘗言十三
君隱隱避秦侶一日厭塵寰冷然遂高舉上山娛賓雲
下山滿豺虎神仙何渺茫虹橋想虛語桃源亦其類好
事自誇詡風氣日已開蛇斷出真主遂令閩山陬盡入
職方宇漢志名始彰祠堂用魚脯流傳世代久琳宮祭
衣羽至今此名山號為神仙府恭惟我遜翁辭闕厥功
溥于焉卜精廬溪山九曲五圖書盡在是斯地儼鄒魯
我以負笈生來茲有年數自慚仁智心未覩高深趣斯

遊亦何意會心覲真遇侃侃平生友惠然肯來顧攜手
敦夙好抗志企遐慕招我山中遊茲遊適余素巍巍大
隱屏屹屹天一柱前瞻晚對亭考槃固其所何當同心
人相與蘿榛莽長松期歲寒修竹倚日莫我自愛此山
躊躇不忍去

題東坡詩集後

東坡真天人再拜當斂衽千古岷峨英浩氣發耿耿用
世固磊落作詩更雄騁熙寧化宜更當國惜已甚胡為

叫怒呶使我毛髮慄九天忠臣心欲發不暇忍雪堂何
從容人事得盡屏江山拓胸次風月動佳興我觀此時
詩下語已清永晚喫惠州飯晨夕對蔬筍和陶數十篇
習氣脫略盡岷江幾百阻到海渺萬頃公詩蓋三變每
變輒近正少年縱橫習豈意造此境偶於玄寂中佳處
得深省學道便為真此語吾敢信文固氣所充要在以
理勝洋洋大雅音千載歎寥泯言詩抑小技所入宜重
慎我詩難示人持此聊自警

春雨

春來一月雨米斗錢三千江空盡絕市竈冷廚無煙我
從莆城來四望良淒然濱海皆食淡邏卒相尋挺纍纍
起夫役蔗局供熬煎玉食寧幾何千百俱並緣祇今二
月節何暇及種田使臣詢民瘼當務固有先近倉有陳
粟庶解朝夕懸州縣價一平鄉閭自然寬欲言事何限
何當息民肩

平江舟中不寐

遠水蕭蕭荻葦風
月明雲外叫孤鴻
丹楓擁被疎篷底
夢斷山深野寺鐘

江邊客舍

輕寒無賴入征裘
野水閒雲總是愁
極目遠山橫靄外
數聲鳴櫓過蘋洲

客舍雨

青煙著雨傍樓橫
展轉虛窓夢不成
客裏清愁無可奈
卧聽簷溜瀉秋聲

越州道中

野田秋溜正潺潺
新翠喬林繞舍環
淡日凝煙橫別浦
斜風吹雨過前山
柴扉初放牛羊出
漁艇方攜蟹蛤還
自笑平生愛遊覽
天教長在水雲間

客裏書事

西風涼信入虛簷
絺綌微單已戒嚴
鄉夢不隨秋夜永
客愁偏向雨聲添
清高鳴雁低雲海
漂泊流螢傍竹簾
搔首寒燈樓舍悄
行藏自曉不須占

擣衣曲

北望悠悠音信少
空房念遠心常早
流螢煜煜夜稍清
塞雁嗷嗷寒已到
細絲清水練方新
在梳半濕日中明
隔籬翁媼寐不熟
月落尚聞砧杵聲
將軍錦帳環歌舞
百戰尚遲歸寸土
老農肩米肉成瘡
思婦裁衣淚如雨

武夷訪友

五月涼巾陟翠微
竹枝香露濕人衣
雲行老樹青猿過
雪落長溪白鷺飛
仙逕好花愁急雨
高亭芳草怨斜暉

我來只欲平林去細扣先生玉版扉

陳深寧極齋稿

深字子微平江人宋亡棄舉子業閉門著書天厯
間或以能書薦之潛匿不出所居曰寧極齋別號
清全有詩一卷及讀易編讀詩編讀春秋編等書
鄭元祐志其子叔方墓稱與子微為僚壻而子微
長三十餘年高談遺經亶亶不倦為一時耆宿云
姑蘓臺晚眺分韻得高字

殘陽古城曲岌岌荒臺高不知何年創尚爾結構牢青

山擁危楯白水環空壕美哉此山谿慘澹悲雄豪當時
一戰霸意氣何矜驕蛾眉坐傾國忠魄隨怒潮空餘故
宮苑寒雀飛野蒿佳辰晤良友清眺舒煩勞夕風振叢
薄鴻雁中天號永懷五湖客一舸凌雲濤浩歌滄浪詞
願言從遊遨

送釋存遊苕川兼懷子昂學士

吳興山水邦杳靄雲氣萃岡巒抱縈迴溪流瀉清駛超
遙煙中客縹緲雲際寺振錫赴幽尋攬袂接遐契是時

秋正中曠朗天宇霽明月射神珠光彩難自閤漁歌和
遺音茶經詫幽事欲從煙屨遊苦為塵鞅繫緬懷金坡
英歸來雲壑媚采采白蘋花因風為遙寄

曹叔時見過索餞篇

泄雲蒙朝日微雨露庭除幽人掩關卧門外無來車曹
子別經歲枉道過我廬謂余抱文藝胡為守鄉閭余曰
匪高尚褊性涉世疎上奉白髮親餘暇讀我書豈知叔
時甫妙年美名譽詞華爛綺繡問學滋新畬奉子一卮

酒聊為譚斯須威鳳翔高閣逸驥騰雲衢及時樹遠業
臨事毋踟躕

內人臂白鸚鵡圖

華清宮中歌既醉南海奇禽遠爭致玉環最愛雪衣孃
當時曾得龍顏媚璿房雕檻春日長繡裯嬌兒在傍戲
君王憐汝解語言懷恩不說宮中秘臨風驚鳥何軒軒
歎惜純良遭猛厲苔翁寫出當時事側立紅衫內人臂
江花滿地不忍看空拂畫圖憐俊慧

書駿馬圖

王良伯樂骨已朽曹霸丹青亦希有開圖歛見神駿姿
對酒高歌雄劍吼祇今騏驥困鹽車落日長鳴漫昂首
嗤嗤俗眼迷天機相士嫌貧馬嫌瘦

南遊

驅車登遠道白日忽西流宇宙驚新夢山河感舊遊雲
迷江令宅月澹庾公樓已已知何柰長歌去國愁

寄友

海內皆兄弟情深莫若君
那知經亂後翻作久離羣
皎皎雲中月悠悠巖上雲
相思不可見清夢遶江濱

登陽山妙淨院

野寺雖牢落山僧亦自如
幽棲鄰虎穴靈跡近龍居
地勝軒楹古天寒草木疎
憑高望城郭把酒一欷歔

江上

放跡清江上悲歌惜歲窮
孰能回白日我欲問蒼穹
天地遺民老山河霸業空
清愁無著處卷入酒杯中

答霜晴詩二首

旭日照蕭晨，淒清不受塵。
冷光明似雪，冬暖勝如春。
紅葉輝相照，黃花色愈新。
南窻差可愛，曝背豁天真。
朝暾上高樹，霧卷海天遙。
勁氣乘寒凝，嚴威見日銷。
鐘清出遠寺，馬滑恐危橋。
稍逼南枝暖，疎花破寂寥。

次韻陸承之寒夜有懷

壯志寥寥在流年，冉冉催寒鐙。
和夢照暗雨，挾愁來白
雪。詞難和青山，首重回夜闌。
渾不寐，慨想陸機才。

送耕存大參使日本

陸賈初馳詔終軍已請纓上方專委任南國誦威名挂
席鵬風順敲舷蟬月明陽侯應拱護不遣海濤驚

悼亡

短日一何急殘宵不肯明霜寒那有夢月落重傷情壁
凍琴絲斷風驚燭淚盈微言憶王衍達理悟莊生

曉望吳城有感

嗚嗚寒角動城頭吹起千年故國愁才見專諸操匕首

旋聞西子載扁舟，霜寒古寺鐘聲早。
月落南園樹影秋，一笑浮華易盈歇。
白雲長在水長流。

送劉梅溪遊句曲

華髮蕭蕭兩鬢秋，醉眠花竹舊風流。
天心橋畔行將老，劉居吳天心橋地肺山中隱去休。
半嶺白雲容可玩，一菴明月

尚空留

劉有故菴山中

西風趣赴方臺約，巖下遙看二老遊。

句曲

有四平山亦名方臺劉故人呂江蟾號四平翁

次韻子封承之遊桃花塢

閭門行樂送韶華閑訪城陰野老家黃蜨得晴飛菜葉
翠禽隔浦啄桃花衡門倒屣臨官路古渡橫舟閣淺沙
亦有詩人時一到醉吟行盡夕陽斜

雪後遊石湖

衆峰戴雪玉崔嵬風定湖光鏡面開山色可堪西子笑
溪聲曾送越兵來天寒野水搖孤艇日落浮圖對古臺
回首風塵翳城闕愁來誰伴倒清壘

湯梅山為道士歸吳還山賦一詩以餞

三年猶向孤山住應為梅花滯水濱
滄海鶴歸空有語
荒城草長又逢春
芝田火暖丹砂熟
松嶠花香白釀新
安得與君俱隱去
煙蘿深處著閒身

舟行解后周西園出示迴文詩就次韻

遊遨適興隨幽境笑語相逢忽竝船
流急濺袍飛帶雨
岸回迷草暗浮煙樓高近水涵飛鳥
樹密藏雲咽恨鵲
愁破已空尊酒綠
醉吟同眺晚晴天

題秋塘圖

水落秋菰老夕寒烟樹微絕憐雙白鷺飛去似知幾

題畫扇騎驢踏雪

雪沒驢腰白行行詩興催不因太清絕那肯犯寒來

題扇上畫

古木排山立幽窻傍水開直疑林處士獨櫂小舟回

小園即事

淡黃楊柳著煙輕細草茸茸襯履行行到水邊心會處
夕陽一樹杏花明

南湖史君製暗香湯奇甚賦絕句求之

霧閣雲窻深閉春微聞玉杵擣清聲玄霜祇許雲英見

地上詩人渴夢生

時侍姬新至
故戲及之

和南湖史君煙景墨梅圖

時聞有惠
州新除

依約羅浮翠嶺前美人玉立破蒼煙畫圖未許分明見
一夜春風入夢先

題唐圉人調馬圖

飛龍天殿隘雲稠一足驕馳掣電流
櫪下髯奴真廝養

眼中元不識驂騑

賦桂山

其人善琴
書大字

小山桂樹碧雲西三疊琴心月未低
曲罷便乘蒼鳳去
廣寒瓊榜要新題

濟南趙君成南使羈留三紀得還其猶子錄其
遺事求詩為賦一絕

三十六迴秋月明年年望斷雁南征
蘇郎皓首還鄉去
愧殺當時李少卿

陳植遺稿附

植字叔方深之子也克繼父業有孝行屢辟召不起善畫工詩自號慎獨癡叟卒於至正二十二年有遺稿若干首明祝希哲手抄并附鄭元祐所撰墓志於後

送趙生

玄雷峰如畫別來勞夢思江鄉為客久歲晚到家遲夜
暖梅花發冬深草亦衰紅塵染衣袂莫使白雲知

綠水曲

綠水西閭道送君江上行
盆城應不住五老笑相迎

龍興寺

次唐綦母潛韻

先朝黃葉寺老屋白雲扉
燈續長明火僧猶壞色衣
馱經馬跡遠念佛鳥聲微
惟有閑閑叟坐看紅日飛

次友仁泊舟虎丘獨步

西丘雨過落花邨
決決溪塘水漲渾
樓閣日斜惟影立
轆轤泉滴尚聲喧
無言蒼石空橫道
傲世青山不出門

獨往忽驚春已去題詩猶記刻舟痕

題畫

風裏征帆驢上人前程路遠又斜曛不知有客紅塵表
閒看青山起白雲

袁易靜春堂集

易字通甫平江長洲人丰姿秀朗不求仕進部使者將薦之於朝謝不可行中書省署徽州路石洞書院山長罷歸所居吳淞具區之間築堂曰靜春聚書萬卷手自校定堂之外蒲荷松菊梅竹之屬繚繞其間左江右湖禽魚翔泳或風止雨收挾小舟以筆牀茶竈古玩器自隨扣舷高歌望而知為世外人也所著靜春堂詩集四卷郡人龔璠子敬

郭麟孫祥卿湯彌昌師言為之序一時名士如楊仲弘鮮于伯幾黃晉卿輩皆有所論次趙魏公作卧雪圖貽通甫稱通甫子敬祥卿為吳中三君子云兵火後刻集散失而諸公手書尚存明正統中吳文恪公訥題其卷尾曰元世祖初克江南畸人逸士浮沈里閭間多以詩酒玩世元貞大德以後稍出居儒黌以淑後進若靜春與子敬師言是也通甫子泰孫永福皆以能詩名嘉靖間南尚書洪

愈通甫九世孫也

遊蘇子美滄浪故園

昊穹積長陰寒日光炯碎虛徐少城隅物色入遐睎蘇
侯故臺沼蕪沒今誰記依依故址存慘慘迴飈厲谷傳
飈飈嘯地失神靈衛伊人百夫特文采傾當世立朝罹
罔羅抱影投荒裔阜淹天馬逸韝困秋鷹驚空餘意氣
雄磨盪山岳銳生存且飄泊身後何嗟異下泉雖冥冥
精爽不可閤孤城千載歸秋風九皋唳

登開元寺閣觀浮海石佛

招提控城闔飛閣峙千尺白日轉芬楣朱霞覆檐隙升
高覽萬象目眩潛動魄天驚決漭懸地覺虛無闢閣中
兩金象竒姿斲山石當年浮巨海波汜來中國未聞積
水厚能負萬鈞力瞽俗昧玄津至人示靈蹟區區拯世
心於道詎無益危坐睨隋唐浩劫一朝夕檻前飛鳥逝
戶外流水疾九衢冠蓋場浮埃浩如積車馬何時閒丹
梯展良覲

胡西軒道院竹石

靈石起微雲，高簞嘯飛雨。
解襟散幽寂，清心見琳宇。
道人方燕坐，碧鮮照巾屨。
客來但對面，莊視不得語。
如觀溫伯雪，目擊破千慮。
清風何方來，泠然入窻戶。
羣籟起虛谷，衆妙會靈府。
飄飄紫鳳鳴，蕭瑟驪虬舞。
伊予墮塵罔，憧憧困馳騖。
神棲方外久，夢繞雲卧屢。
永願繼壺公，終當效巢父。

送潘鶴臞歸侍母

冉冉虞淵月迴光照我衣蕭蕭大隄馬送客長鳴嘶窮
冬霜雪繁陟岡行旅稀子何意浩蕩歸心如奮飛王粲
故鄉志江淹南浦悲丈夫各有適聚散焉可期子有白
頭親天寒守重闌蟪蛄懸牖戶知子行當歸舉觴慈顏
和升軒福履綏士生食萬鍾高堂色養違何如衡門下
菽水歡逶迤羨子敦懿義家聲良不虧閒居富詞藻札
翰時相貽

贈禽行陸生

徵士士龍之子孫天馬為胸氣深厚逸才致遠誰能羈
少年氣已干牛斗爾來狼狽一緼袍豪蕩肯居狐貉後
文豹深藏霧雨濛潛蛟終作風雷吼相羊塵市昔傾蓋
執雉定交歡握手燕坐談天試相語擊蛇掉尾還應首
衆人乃欲攘其踰無異醢雞喧甕缶獬冠蟬弁戲推許
鼠目麀頭慚老醜嗟予退處操如蚓分與窮猿擅林藪
蟲飛蝠伏各有時萬物行藏信非偶文章藻繪亦安用
畫虎不成徒類狗寧為牧豬隱蒲博雖非待兔聊株守

金方四庫全書
卷十一
猗裒無堪廁朝列鹿門正可安農晦君不見千秋麟閣
誚獼猴烏用丹青傳不朽

過長安堰

霜落天清木葉零我非王事亦宵征三更燈火魚龍動
千里星河雁鶩鳴大舶低昂銜尾進扁舟來往一身輕
抱關恐有高人隱野客低頭愧送迎

送湯師言番江書院山長

風土迢迢吳芮邑送君還憶舊羈棲芝山擁郭蒼龍卧

番水粘雲白雁低
遠道故應勞夢想
一官那得限東西
野花芳草江南路
千里秋風入馬蹏

杭州道中書懷四首

涉世恒多故
謀身轉益迂
馬周聊逆旅
阮籍豈窮途
鷺宿依船尾
楓彫落酒壺
遠行慘慄意
對此不能無
白露籠舟楫
青山失畫圖
往來迷只尺
收歛忽斯須
野曠連飛鶻
江清映浴鳧
還將明媚色
且復慰征途
堤柳欹招攬
汀花笑入舟
高歌鳧鵠起
濶視水雲流
牢

落江淹恨飄零庾信愁都將付尊酒短髮得禁秋
憂患看飄瓦浮沈任轉蓬題詩霜葉赤對酒燭花紅嵇
阮情何曠陶韋意未窮前賢負高興不必萬人同

重午客中三首

往恨湘纍遠他鄉楚俗同流傳存弔祭汨沒見英雄竹
葉於人綠榴花此日紅未須嗟旅泊吾道豈終窮
湖上冥冥雨和愁細似塵翠嵐沾玉塵清潤逼綸巾他
日看濃抹茲晨做淺顰遂諳山水意有為苦留人

令節殊方客虛樓莫雨時何心吟鑄鏡子髮欲成絲
昌歎誰浮玉芳醪且滿卮今朝羈旅思更用獨醒為

寄吳中諸友六首

錢德鈞

風雨蕭蕭裏雞鳴夜向晨簡編心力盡燈火鬢毛新
餘地知游刃何人解斲輪煩君毋割席漂轉暫埃塵

蕭子中

竝馬春風陌高歌夜雨牀遨遊前夢失漂泊此身忙
綠

酒西湖色冰肌六月涼
難招髯似戟來對玉成行

湯師言

卓行拘常調微官更數移
君懷同棄屣吾道歎如絲
落才高世飛騰命與時
晚成梁棟器剩破十年遲

唐希賢

枉策招尋密高談謔浪俱
他鄉懷楚奏何日攬桓須
白月垂文練青天落酒壺
看君話心事餘子盡崎嶇

趙明仲

共話巴山雨曾題華步秋儒官雖寂寞公子是風流即
擬同吳詠焉知效楚囚江南新作賦寄爾恐添愁

馮景說

之子華簪裔簞瓢祇晏如為郎應駐輦延客愧無車早
託襟期合能容禮法疎一燈何日共料理讀殘書

右十
三詩

命意閒遠下語清麗可謂不流于俗矣然少加精密杜
少陵黃山谷不難到也困學民漁陽鮮于樞題其後而
還之大德辛丑
冬至前一日

首夏邨居雜興二首

穿逕幽篁破嫩苔
遶池漲綠潑新醅
鰲黃梢蝶驚還起
翠碧窺魚去復來

綠樹荆扉晚更幽
鱸魚菰菜近堪求
故人有興能尋我
但覓吳淞欲盡頭

八月一日雨後賦兼寄城中諸友

今我不樂思出遊
宿酒昏昏仍懶惰
安得涼颼破煩鬱
竹頭搶地桐陰妥
紈扇那能脫腕揮
紗巾不覺酣眠墮
誰喚飛雲起天末
政用此時持贈我
渴龍掉尾下飲江

列缺為右豐隆左蜿蜒初若彌六合變滅忽復成么麼
長空收曠淨千頃落日著山縣米芾白衣蒼狗覓虛無
孤鶩斷霞明細瑣人生萬事風雨散苦欲控搏無一可
嗟予學道良已晚閱世忘憂今亦頗西疇穉碧參差
南埭芙蓉紅婀娜聊尋清景日追逐况復川原秋淡沲
故人城郭尚留連何時共鼓吳淞柁

正月十六日與德鈞子敬翼之洎兒子震遊東

季博山園賦詩

我愛山園好芳堂隱薜蘿野雲棲不去風葉掃還多暫
憇忘城郭長謠咏澗阿不嫌頻啓鑰重過意如何

湖上即事多懷月心之辭

浙東山色渡江青眼底新詩向此成天盡雲低看鶻落
日斜風細待潮生

送罷東風身是客午窗半對紫玫瑰家山枕上分明見
何處濃香喚夢回

題扇

飛燕驚鴻擬未真飄飄直欲似行雲
入舟山色羞眉黛
隔岸榴花避舞裙

白海青

并序

尚方有賜江浙省臣白海青者杭州人士美以歌
詩徵余同賦

渺渺東溟刷羽翰乍隨天馬萬人觀
孤飛雪點青雲破
一擊秋生玉宇寬
賜予豈將追雁鶩驅除直欲辨臬鸞
江南明月難同色夢想瑤階白露漙

春日雪中

蕭齋聽寒雨出戶霰已集飛霙點砌銷綠苔稍沾濕紛
紛漸填委勢若包原隰冥觀陰陽妙欲張故先歛定知
陳荻下已有春風入

與師言客錢唐凡三月餘師言歸後作詩奉寄
燈花猶記別時紅為報君歸我亦東豈意黃塵迷瘦馬
尚淹青眼送飛鴻羣山積雪清相射千樹寒梅望欲空
何遜揚州才思減試煩妙語喚春風

春雨漫興三首

日日春陰祇欲眠
強尋南陌復東阡
猶殘碧樹花多少
莫惜金尊酒十千
象管烏絲題往事
玉簫錦瑟負華年
愁來祇對西山坐
卷起疎簾翠接天

江上平蕪望欲迷
江邊密雨細如絲
冥冥白晝飛花急
漠漠青林度鳥遲
春事又當三月莫
人生那得百年期
誰能苦惜纏頭錦
喚取嬌嬈舞柘枝

積雨厭厭愁斷腸
暫晴猶得見春陽
頻來幽鳥當窻語

半落閒花度水香
彩筆彫零詩漫興
金杯搖蕩酒生光
悠悠心緒渾拋却
付與遊絲共短長

和師言窮居即事韻二首

城郭煙花裏屋廬蕭然誰識范
萊蕪借居種竹憐君達
築室移山笑我愚
坐久眼看烏几綻
醉來頭向墨池濡
壯心縱復都銷盡
未害狂歌擊唾壺

來詩有壯心觸事漸消磨之句

雨聲連夕亂鳴簷
野色今朝稍入簾
綠樹成圍黃鳥度
青天欲盡白波粘
熊經懶戲愁危坐
鵲語無憑喜漫占

若話浮名身外事畫蛇無足不須添

題畫黃葵

憶昔戎葵花下飲金杯春豔綠鬟欹祇今花似金杯側
獨對西風詠折枝

因公事留驛中遂登姑蘇臺晚望

古驛西風起中含水國秋官閒公館靜鳥下吏人休移
簾微涼入登臺晚興留亂蟬當檻急衆木抱城稠天迴
搏蒼鵲山橫走翠虬虛無疑地盡突兀并雲浮絕景嗟

才窘微吟怯語適煙霏生變態鷗鷺傲冥搜初月清如
濕殘霞散不收似乘牛渚舫若在武昌樓娃館今荒草
吳宮祇廢丘按圖非舊跡訪古莫深愁蘋浦漁歌斷楓
根鬼唱幽掠簷聞鶴警照席數螢流止舍慚昭子投亭
愧褚裒疏頑能稍稍漂轉付悠悠茲宇閱人久伊誰似
我儔途窮翻一笑鬢短耐千憂世故從飄瓦浮生等置
郵三更星斗落萬事入搔頭

秋夜懷友二首

平生故舊誰知我潦倒襟期子畧同縱酒祇判千日醉
讀書少忍十年窮歲華晚晚欺霜鬢物色淒涼入井桐
未用相看歎搖落古來江漢有秋風

屋角闌干北斗垂誰家長笛夜深吹月流河漢天機急
秋到山川木葉知老去潘生聊漫賦向來宋玉不勝悲
四時代謝渾閒事有底窮愁入兩眉

戲調月心

扣門載酒可容來懷抱相看得好開祇恐彭宣驚女樂

後堂絲竹一時迴

陳仲淵別室

琴中流水瀾翻落畫裏秋山雜杏開更欲移牀傍修竹
卧看饑鶴啄莓苔

郊居寓目隨事輒題四首

雨洗萬象出暄和風日新鷗聲春命侶山色莫迎人
絕江捕寒魚赤鱗巨莫逃鯨鱮翻有神騰出如銀刀
把酒清江上扁舟送夕暉行雲杯裏度白鳥鏡中飛

決決堰根水跳珠終日鳴
班荆坐忘返中有激湍聲

袁泰遺稿附

泰字仲長通甫次子以文學世其家為郡學教授
別號寓齋義烏王子克為之記

次壽道韻二首

桃花夾岸護溪莊白髮漁翁久坐忘
過客此時停短棹
道人終日閉虛堂雨沾弱柳垂垂綠
風動新篁隱隱香
茗鼎忽聆烹蟹眼車聲真用繞羊腸

煙際輕篷帶雨推水邊疎牖趁風開
朋儕政可班荆坐
船舫時能載酒來
委地花枝徒艷冶
近人鷗鳥不驚猜
翳然林木幽棲意
慚愧愁腸日九迴

再次壽道韻二首

浩浩波聲激壯懷
油油水色綠于苔
垂流好御長風去
得意還期夜月來
醫國恨無三折臂
虧功難累九層臺
年登未免號飢苦
火燎車薪水一杯

青青杞菊遍江莊
隱者盤餐意不忘
蓑笠尚留垂釣石

茅茨重覆讀書堂坐深邨落成幽賞行入禪局有妙香
回首城門車馬跡不堪塵事熱中腸

尹廷高玉井樵唱

廷高字仲明別號六峯遂昌人其父竹坡當宋季
以能詩稱仲明遭亂轉徙宋亡二十年始歸故鄉
嘗掌教於永嘉秩滿至京謝病歸所著有玉井樵
唱正續稿自題其卷首云先君登癸丑奉常第宦
遊湖海作詩凡千餘首丙子家燬于寇遺編散落
無一存者僅憶秋日寄僧一聯曰白蘋影蘼無痕
水黃菊香催未了詩先業無傳雅道幾廢不肖孤

之罪也觀此則仲明詩學有自來矣

江鄉夜興

極浦霜清鴈打圍
漁燈明滅水煙微
天寒想是鱸魚少
犬吠空江船夜歸

宮怨

綠衣無分惹天香
滴碎春愁玉漏長
日上海棠眠未醒
夢隨蝴蝶出宮牆

客中秋社

社日傷心在客中
淒然涕淚落秋風
故鄉田土荒蕪盡
枉向他州說歲豐

翁村思歸

一年歸計久蹉跎
落盡梨花春不多
昨夜翠微深處宿
月明無奈子規何

庚子營又青舊業二首

二十年前此戰場
隔溪野燐尚淒涼
兒童生長他山久
却把家鄉作客鄉

燕子重尋舊主人呢喃語別幾經春足間紅縷猶無恙
巷口斜陽記不真

秋夜旅懷

夢繞家山舊菊叢芭蕉葉葉又秋風閒愁一夜深如海
只在空堦雨滴中

北關買舟

北關門外柳青青閑寄江南第一程別酒未闌山鳥唱
短篷撐夢過臨平

館娃宮

金繡鴛鴦綠錦裯水晶簾底淨無塵
君王醉枕香紅軟
人隔重江正卧薪

揚州后土祠瓊花

無雙亭下萬人看欲覓殘英一片難
夜靜月明猿鶴唳
誤翻玉雪墮闌干

燕山寒

地穴玲瓏石炭紅
土牀蘆簟覺春融
一窻明月江南夢

恍在重簾暖閣中

泊舟維揚

孤舟夜泊倚皇城天際歸心促曉程
二十四橋霜月冷
卧聽鐘鼓送人行

北歸渡揚子

狠石年深已綠苔金焦千古畫圖開
浪花半角殘陽裏
曾見乾坤百戰來

臘月海棠

尤物真能奪化工臘前偷泄數枝紅霜花不上臙脂面
強飾春妍嫁北風

楓塘別業

白雲缺處露簷牙雞犬相聞僅數家幽鳥不啼林寂寂
滿山黃霧落松花

客中思歸

孤燈寒照影清夜自沈吟砧杵他鄉淚松楸故國心路
長歸夢短酒淺客愁深了却江湖債攜書隱竹林

奕山值寇讀杜詩有感

杜曲衣冠盡羣兇
轉陸梁疎林巢燕雀
空谷鬪豺狼
衣濕彭衙雨
砧敲楚岸霜
年荒難自給
拾橡當餱糧

八詠樓

嬰州

披褐便歸休
登臨底用愁
樓空偏愛月
山瘦不勝秋
二水城根合
孤雲天際浮
倚闌千古意
鴻影去悠悠

壬午秋自翁村回奕山

竟別桑乾水
歸并却似家
春風故巢燕
夜雨廢池蛙
石

徑曾栽菊磚爐舊煮茶自憐萍梗迹何日定生涯

別友

風雨江橋別淒然欲斷魂亂離難作客患難易為恩回首人千里論心酒一樽寄梅有良便好認白雲村

耕雲即事

閉門貧亦樂世態任炎涼夢穩疑宵短心閒覺晝長與鷗分釣石留鶴伴丹房休笑生涯薄疎籬橘柚黃

山居

青山深處隱時事不須聞門閉千峯雨樓吞萬壑雲種
花籬密護接竹水遙分羞作千人態甘心鹿與羣

翁村翠流閣

四圍山翠合縹緲見危樓地狹星辰少雲深水石幽溪
聲晴亦雨松影夏如秋寄語遊方者桃源豈外求

古杭秋日

成毀乾坤老炎涼歲月忙冥鴻既寥廓煙鷺亦滄浪江
寺秋雲白宮牆夕照黃凭闌無限意一笑越山蒼

長蘆舟中夜坐

故國五千里孤帆四十程客懷偏浩蕩鄉夢不分明萬
折河流曲三更斗柄橫不眠方宴坐野寺又鐘聲

山中冬日寄綠坡

畏寒終日閉柴門世事炎涼總不聞老鶴踏翻松頂雪
亂猿啼裂隴頭雲強呼竹葉閒澆悶吟對梅花正憶君
何日相過茅屋下夜燒黃葉坐論文

桐江舟中

又搖柔櫓下嚴灘一片離情強自寬
鴉噪暮雲天寂寂鴈歸極浦水漫漫
敲蓬雪霰和愁碎拍枕江聲入夢寒
今夜客帆何處宿亂山青外是長安

臨汀書懷

開盡黃花秋又深不堪清夜聽寒砧
燈前遠信和愁寫枕上新詩帶夢吟
霜月一汀隨瘦影關山千里動歸心
青鞵布襪雲間寺何日鷗盟得再尋

錢塘懷古二首

黃旗紫蓋竟悠悠石鏡塵昏王氣休江上怒濤空拍岸
海門孤障自橫秋琵琶曉月青娥淚禾黍西風墨客愁
寄語湖山半閒老當時肉食為渠羞

鐵鎖沈江事已非枉將陽九咎天時皇王運會無停息
南北山河幾合離吳越英雄春夢斷張韓勲業暮雲悲
淒涼一掬興亡淚隱隱遙聲哭子規

會稽古陵

彩雲散去老松衰劫換灰餘世已非地冷玉魚猶未朽

海深金鴈亦能飛五陵王氣有時盡萬里中原無日歸
牧豎亡羊千古恨九疑山下一沾衣

庚辰故里再燬于寇流落信安僧舍風雨淒涼
羈愁野寺兩淒然又是西風落葉天疎雨半簷澆客恨
白雲一榻對僧眠孤吟天地知何益隻影江湖祇自憐
喚醒十年鄉國夢空山古木亂鳴蟬

思鄉二首

游子春深思故鄉愁聞杜宇哭斜陽世情巖嶮多溪壑

客鬢蕭疎易雪霜
百里荒涼少雞犬
十年奔走避豺狼
何時安坐無行役
一篆銅鑪清晝長

轉目桑田又海波
一襟豪氣半消磨
故園春老蒼苔長
客路秋深黃葉多
獨有吟懷未搖落
却愁歸計易蹉跎
種桃何處尋生理
烏帽青鞵隱薜蘿

過故里感懷

松菊荒涼二十年
衣冠散盡只空村
燒明斷塹山雲暝
鬼哭寒蕪巷月昏
水涸蛟龍移窟宅
草深狐兔長兒孫

誰消一夜崑崙雨洗淨千峰見綠痕

寄汀州伍明夫貢元

鬚髮遙知各已蒼側身南望正淒涼山河遙隔三千里
雲樹相思二十霜目斷塞鴻傷契闊夢隨遼鶴弔興亡
世間何處無明月偏向吾廬照屋梁

憫忠閣

鴨綠江頭往事空燕丹墓側幾秋風乾坤戰骨何曾朽
蒼海餘哀未有窮黑誌可能忘小國赤心聊復慰孤忠

悠悠遺恨人千古回首金甌夕照中

寄劉千里

一道藜光照座寒東風吹入五雲班何時又渡桑乾水
他日無忘飯顙山揮翰風流三島客種花消息數年間
開樽莫負湖山約握手朱樓綠樹灣

三巖瀑布

天然石室踞雲根上有飛泉勢若奔千尺素簾寒不卷
一潭碧玉碎無痕風飄餘濕沾香案月滿疎光射洞門

我欲捫蘿登絕頂桃花流水細窮源

平遠亭

松陽
竹溪

野水漫漫接白雲凭闌轉覺興撩人一川芳草青無際
數點遙峰淡不真煙樹夕陽開畫軸風帆沙鳥伴吟身
箇中儘有閑田地何必桃源更問津

雙溪道中值風雨

竹輿咿軋嶺嶇崎三宿纔方出翠微遠水帶煙爭晚色
西風挾雨作寒威綠莎路繞黃泥關烏柏林藏白板扉

屈指重陽歸又近樽前兒女笑牽衣

江心寺

潮落潮生卒未休依然雙嶼鎮中流
斗杓橫截江城北殿脚長隨雪浪浮
龍起太虛雲護塔僧歸薄暮月隨舟
翠華夢斷釣天遠翰墨空軒竹樹秋

登淨江寺松風閣

歸然傑閣倚松崗縱使無風也自涼
四面闌干金碧界萬家城郭水雲鄉
清江疊嶂迷空闊白鳥蒼烟墮渺茫

風景不殊君記否吳山頂上看錢塘

山居晚興

高住青峰不計層閉門危坐絕交朋竹聲欲斷微聞雨
村色初昏遠見燈宿鳥並枝閒寂寂歸雲度壑慢騰騰
鄰翁笑我生涯拙紙帳梅花絕類僧

銀嶺書懷

并序

大德乙巳端陽將男祖憲祖惠遠遊出門風雨大
作四日始度銀嶺泥滑不可言偶誦銀嶺遙遙馬

戍高之句蓋古野人語也足而成章

祖憲仲明長子也亦能詩

仲明嘗得句云水影倒棲松頂鶴竟不能偶
祖憲以谷聲遙答嶺頭猿為對因足成篇云

泥滑滑泥滑滑竹雞雨聲相間發銀嶺遙遙馬戍高行
行白盡征夫髮征夫髮白白如絲樹本欲寧風撓之壯
士心腸類鐵石別離肯作兒女悲終南嵩華在何許我
欲登高一懷古會逐羣仙駕紫鸞咳唾九天落香露

車中作古樂府

車歷轆車歷轆驢牛逐逐雙轉轂可憐喘汗更鞭朴行

到深更鞭轉速老夫平生苦暈眩兩手扶頭身感縮停
車少憩日又出東栝營炊道傍屋牛疲馬跛筋力絕世
上利名心未足前車未去後車續車歷轆車歷轆老夫
柳下眠正熟鈴丁當鈴丁當大車小車擺作行問渠捆
載有何物云是官滿非經商蟠螭金函五色毯鈿螺椅
子象牙牀美人嬌嬌如海棠面簾半染塵土黃迎門軟
脚鬧親舊提擎酪甕刲肥羊人生富貴歸故鄉鈴丁當
鈴丁當老夫北行書滿箱

永嘉書所見

此邦幸小稔竊祿似有緣出門見流民令我心惻然十
十復五五乞食相後先有男方呱呱中道甘棄捐誰無
父母心其勢難兩全况遭疫癘苦十病無一痊死者相
枕藉活者難久延彼哉萬錢箸所厭皆肥鮮餓骨半王
孫汝食能下咽嗟嗟吾赤子斯食寄之天似聞齊魯郊
斗粟價十千

巢燕行

巢中雌燕斃衆雛待哺雄疲于奔役忽棄
去越宿別偶一雌以歸對語梁間愛飼加

至未幾乘雄之出也盡擠其雛
乃自有卵予見其事因紀之

烏衣失偶成孤飛巢中黃口爭告飢茫茫天地憐隻影
擇配忽復來其雌居梁對語相慰勞衆雛須有更生期
誰知微物有機穽啍啍相哺成相欺擠排轉眼施毒嘴
愛惜乃各私其私一朝育卵重所出父兮獨不哀伯奇
親疎恩義有厚薄肝膽楚越將奚為履霜之操亦尚矣
之二蟲者曾何知

雨中度揚子江見海怪出沒

吳頭楚尾天一隅
長江浩渺雲模糊
中流風急浪花湧
船頭黃帽驚相呼
蜿蜒海怪互出沒
踴躍與我為先驅
神閒意定若無見
自信膽氣由來麤
江神唯識詩客意
故爾獻狀聊相娛
岸旁青帘酒可沽
拔劍割炙傾玉壺
與君痛飲留斯須
此意此意不可孤
山川慘淡百戰餘
古今變態難盡摹
且書雨裏金焦圖

盧溝曉月

闌干滉漾晨霜薄
馬度石橋人未覺
滔滔流水去無聲

月輪正挂天西角
千村萬落荒雞鳴
大車小車相間行
停鞭立盡楊柳影
孤鴻滅沒青山橫

薊門飛雨

清風夾道槐陰舞
誰信青天來白雨
馬上郎君走似飛
樹下行人猶蟻聚
須臾雲散青天開
依然九陌飛黃埃
乃知造化等兒戲
一日變態能千迴

悲故鄉集杜詩句二首

戰哭多新鬼
江山雲霧昏
餘生如過鳥
故里但空村
蜂

薑終懷毒狐狸不足論銷魂避鋒鏑作客信乾坤
遭亂髮盡白憑軒涕泗流望鄉應未已疾惡信如讎
歲月亦已久干戈不肯休何時滅豺虎高枕對南樓

蕭國寶輝山存藁

國寶字君玉別號輝山山陰人以鄉舉官吳江遂
家焉有輝山存稿若干首其嗣子英所編東魯孔
濤為之序稱其握瑜懷璞韞而不沽發而為詩皆
有補於世道近世浙右以詩名者稱張鄧仇白余
皆獲從之遊獨以不及一識君玉為恨時至順辛
未歲也明崇禎間十五世孫雲程重訂僅存二十
餘首

閒居

開扉對東臯逸興覺偏豪
積雨苔痕合殘陽樹影高
獨醒無酒債多病為詩勞
學得安貧法悠然讀楚騷

秋思

閒看浮雲白臨風清且涼
煙林含紫翠霜菊間青黃
遠浦沈孤鶩荒郊宿野航
心空隨地靜木石自相忘

餞張大使游淮

竟夕相歡無俗賓
悲歌彈劒壯青鱗
一蓬夜雨家山夢

千里春風淮海身纔解河橋楊柳密酒沽邨店杏花新
此行早獻安南策露布爭傳奪虎巾

春日

東風竟日掩柴關讀罷離騷新火煙一簞落紅春埽地
半篙新綠水連天夢魂枕上驚蝴蝶鄉思燈前怯杜鵑
祇為儒冠空白髮幾將心事賦歸鞭

晚興

翻盡殘書已落暉樵歌引我出柴扉江橫露氣吞漁艇

風挾秋聲動羽衣沙草荒涼黃犢卧渚花蕭瑟白鷗飛
斷雲數片無拘束滿目青山入翠微

九日風雨

無端風雨路漫漫合作重陽一日寒酒帶儒酸休怪吏
花含客淚欲辭官蛩聲強聒江城晚鴈影橫沈塔水寬
閒就竹牀成一夢小兒偷為整頰冠

次韻寄梵天方丈古巖

方將飛錫思怱怱竟夕蒲團月影重剖破菊籬花雨散

心歸蓮社色身空棲禪石煖雲生衲載酒船香雪滿蓬
簡盡殘經無字悟覺來幡動不關風

山居詠

殘紅零落鳥無言結竹為籬夢不喧雨漬短垣茸草色
水涵空石露蒲根風搖碎影春將盡煙裏深林月欲昏
冷硯久荒時一洗墨香狼籍引魚吞

夜過吳江

西風颯颯一帆輕路入松陵夜正清市戶殘燈臨水影

漁邨短笛隔雲聲
丹楓葉落霜初肅
白葦花開月倍明
我有元龍豪氣在
四橋波浪不須驚

冬夜

虛室寒侵骨
疎梅月影牀
三更孤鴈淚
悲怨不成行

贈寂堂和尚


冷雲和衲定
悟到覺身輕
地靜人偏勝
山空水亦靈

題畫

半山蒼靄鎖招提
託宿僧寮路欲迷
惟有曉鐘遮不斷

數聲吹落小橋西

元詩選初集卷十一



總校官候補中書臣吳紹深
校對官編修臣馬啟泰
謄錄監生臣夏清和